



Kwa Vifungo vya Huruma ya Kibinadamu

Akaja mwanamke Msamaria kuteka maji. Yesu akamwambia, Nipe maji ninywe.—Yohana 4:7.

Yesu hakumpita mwanadamu yeyote kama asiye na thamani, bali alitafuta kutumia dawa ya uponyaji kwa kila roho. Alipojikuta katika kundi lolote, Alitoa somo linalolingana na wakati na mazingira. Kila kupuuza au matusi yaliyooneshwa na wanadamu kwa wanadamu wenzao yalimfanya tu Yeye kufahamu zaidi hitaji lao la huruma Yake ya kibinadamu ya namna ya Mungu. Alitafuta kuwatia moyo kwa tumaini wale waliokuwa wakali na wasio na matumaini, akiweka mbele yao uhakikisho kwamba wangeweza kuwa watu wasio na lawama na wasio na madhara, wakipata tabia ambayo ingewadhahirisha kama watoto wa Mungu....

Japokuwa alikuwa Myahudi, Yesu alichangamana kwa uhuru na Wasamaria, akipuuza desturi za Kifarisiyo za taifa Lake. Licha ya chuki zao alikubali ukarimu wa watu hawa waliodharauliwa. Alilala nao chini ya dari zao, akala nao mezani mwao—akishiriki chakula kilichoandaliwa na kutengwa mezani kwa mikono yao—alifundishwa katika mitaa yao, na kuwatendea kwa wema na kwa uungwana mkuu. Na alipoivuta mioyo yao Kwake kwa vifungo vya huruma ya kibinadamu, neema Yake ya namna ya Mungu iliwaletae wokovu ambao Wayahudi waliukataa.

Kristo hapuuzi fursa yoyote ya kuihubiri injili ya wokovu. Hebu sikiliza maneno Yake ya ajabu aliyomwambia yule mwanamke Msamaria. Alikuwa ameketi katika kisima cha Yakobo, wakati mwanamke alipokuja ili kuteka maji. Kwa mshangao alimwomba kitu. “Nipe maji ninywe,” Alisema. Alitaka kuweka mazingira sawa, na alitamani kufungua njia ambapo angeweza kumpatia mwanamke huyu maji ya uzima. “Imekuwaje” alisema mwanamke, “wewe Myahudi kutaka maji kwangu, nami ni mwanamke Msamaria? Maana Wayahudi hawachangamani na Wasamaria.” Yesu akajibu, “Kama ungaliijua karama ya Mungu, naye ni nani akuambiaye, Nipe maji ninywe, ungalimwomba yeye, naye angalikupa maji yaliyo hai” (Yohana 4:7–10)....

Ni kwa kiasi gani Yesu alionesha kupendezwa na huyu mwanamke! Jinsi gani maneno Yake yalikuwa ya bidii na ushawishi! Mwanamke huyu alipoyasikia, aliuaacha mtungi wake, na kwenda mjini, akiwaambia rafiki zake, “Njoni, mtazame mtu aliyeniambia mambo yote niliyoyatenda. Je! Haimkini huyu kuwa ndiye Kristo?” Tulisoma kwamba “katika mji ule Wasamaria wengi walimwamini” (aya ya 29, 39). Na ni nani anayeweza kukadiria ushawishi ambao maneno haya yameutoa kwa ajili ya kuokoa roho katika miaka ambayo imepita tangu wakati huo?

Popote ambapo mioyo inafunguliwa ili kuupokea ukweli, Yesu yuko tayari kuifundisha. Anawafunulia Baba, na huduma inayokubalika Kwake Yeye asomaye moyo. Kwa hao Hatumii mifano. Kwa hao, kama kwa mwanamke kisimani, Anawaambia, “Mimi ninayesema nawe, ndiye” (The Ministry of Healing, 25–28).